

Landsbyggðarvinir

# *Heimabyggðin mín*

## Reykhólar allan ársins hring

Fanney Sif Torfadóttir



## Inngangur

Reykhólar eru mikil náttúruparadís. Við höfum hér t.d. Barmahlíð, Breiðafjarðar-eyjarnar, öll fjöllin, mikið af fuglum og margt margt fleira.

Á Reykhólum er til frásögn af því þegar Grettir Ásmundarson bar naut á herðum sér frá sjó að bænum og var nokkurra kílómetra leið að fara. Rithöfundurinn Gestur Pálsson fæddist rétt hjá Reykhólum og þar fæddist eitt af höfuðskáldum Íslendinga, Jón Thoroddsen. Eina þörungaverksmiðjan í heimi er á Reykhólum.

Kostir þess að búa á Reykhólum eru margir. Í fyrsta lagi, þá er þetta mjög lítill staður þar sem allir þekkjast og samskipti eru náin. Í öðru lagi, þá er náttúran í kringum Reykhóla mjög falleg og fjölbreytileg. Fuglalífið er víðfrægt og það eru t.d. mjög góðar líkur að þú getir séð haförn fljúgandi yfir höfði þér.

Gönguleiðirnar eru einnig frábærar í náttúrunni í dásamlegu landslagi. Á staðnum er dásamleg sundlaug, Grettislaug, en hún er kennd við Gretti Ásmundarson. Svo má ekki gleyma að nefna skólann okkar og leikskólann, en þar fer fram mikið og skemmtilegt starf.

## **Meginmál**

Það er oft kvartað yfir því að ekki sé nóg um að vera úti á landi nema helst um sumarmánuðina. Ég tel að í Reykhólahreppi megi hafa viðburði allan ársins hring og hef nokkrar hugmyndir að því. Meiri starfsemi skapar meiri atvinnu og það leiðir af sér fólksfjölgun og staðurinn myndi stækka og verða menningarlegri. Allar byggðir byggja á því að nóg sé um að vera, næg atvinna og gott mannlíf.

Eftirfarandi hugmyndir hafa það að markmiði að efla byggðina og fá fólk til að skoða möguleikana sem bíða.

## **Haustviðburðir**

- ♥ *Selaskoðun.* Selir halda sig mest í látrum yfir fengitímann og alveg þangað til kóparnir eru orðnir vel syndir. Fengitími landsela er í ágúst og september og þeir kæpa á vorin í maí-júní. Farið væri á bát að selalátrum og selirnir skoðaðir. Selir eru veiddir og þá væri náttúrlega hægt að fara í selsmökkun.
  
- ♥ *Berjatínsla í Barmahlíð.* Sagt er að bestu bláberin sé að finna á Vestfjörðum, en norðanvert landið hefur haft orð á sér að vera með besta berjalandið. Úr bláberjum mætti útbúa alls konar góðmeti, hefðbundið sem óhefðbundið, sultur, safa, jafnvel krem, o.s.frv.
  
- ♥ *Réttir* eru haldnar á haustin þegar féð er rekið af fjalli. Ferðamönnum þætti mjög gaman að fá að taka þátt í öllu því amstri sem fylgir göngum og réttum. Til þess að þetta mætti koma til framkvæmda, þá yrði að byggja um ferðaþjónustuna á svæðinu, bæði á Reykhólum sjálfum sem og í sveitunum í kring.
  
- ♥ *Gönguferð um Barmahlíð.* Á haustin er mjög fallett í Barmahlíð því að þá skartar náttúran sínum dásamlegu haustlitum og þá er ekki amalegt að ganga um Barmahlíðina. Ef heppnin er með má sjá erni fljúga yfir með sínum stórfenglegu vængjatökum. Gönguleiðin sjálf er virkilega falleg. Ég hef sjálf orðið vitni að því að sjá erni á sveimi á þessu svæði og voru þeir að þjálfa ungana sína í að fljúga. Þeir voru svona þremur metrum fyrir ofan okkur. Þetta var frábær lífsreynsla. Þessi viðburður tengist ferðaþjónustunni á einn eða annan hátt. Það mætti skipuleggja stakar gönguferðir fyrir gesti og gangandi en einnig gætu þessar gönguferðir verið hluti af stærri pakka. Að gönguferð lokinni biði gestanna heit kjötsúpa eða annar góður, þjóðlegur matur í anda haustsins.

## Vetrarviðburðir

- ♥ *Skautuferð.* Í nágrenni Reykhóla er Berufjarðarvatn. Þangað má fara á skauta þegar vatnið frýs. Á svæðinu þyrfti þá að vera lítill skáli eða kofi þar sem hægt væri að að leigja skauta, hjálma og hlífar. Einnig væri upplagt að bjóða upp á kennslu á skauta því ekki eru allir færir á þessu sviði.
- ♥ *Vélsleða- og skíðaferðir á Þorskafjarðarheiði.* Mjög margir hafa áhuga á því að þeysa um náttúruna á vélsleða. Því væri upplagt að koma upp vélsleðaleigu eins og tíðkast víða og fara með ferðamenn upp á Þorskafjarðarheiði þegar nóg er af snjó. Einnig væri hægt að bjóða upp á skíðaferðir á sama stað og hafa því skíðaleigu á svæðinu. Á Þorskafjarðarheiði er upplagt að ganga um á gönguskíðum og jafnvel fara á svigskíði. Það myndi þá kalla á uppbyggingu ferðaþjónustu sem sérhæfir sig í skíðastöðum. Gönguskíði kosta ekki eins miklar framkvæmdir.

## Vorviðburðir

- ♥ Eins og á haustin er Barmahlíðin falleg á öðrum árstíðum, t.d. á vorin. Náttúran er að vakna til lífsins, ungar að koma úr hreiðrum og trén að lafgast. Gönguferðir í Barmahlíð eru því skemmtilegur kostur. Það þarf að koma upp góðri aðstöðu þar fyrir gesti og gangandi, s.s. fleiri nestisstaði, útsýnispalla, kort af svæðinu o.fl.
- ♥ Hjólaferðir eru vinsæl íþrótt. Á Reykhólum ætti að reka hjólaleigu, þar sem hægt væri að leigja fjallahjól og allan búnað. Bæði geta ferðamenn þá farið sjálfir á hjóli um svæðið en einnig í skipulögðum hjólaferðum.

## Sumarviðburðir

- ♥ *Fuglaskoðun.* Eins og fyrr segir er á Reykhólum mjög fjölskrúðugt fuglalíf. Ferðaþjónustufólk myndi þá bjóða upp á skipulagðar fuglaskoðunarferðir. Eins þyrfti að setja upp skilti með myndum og fróðleik um fugla á svæðinu. Boðið upp á gönguferðir með nesti og fræðslu. Gönguferðir væru kringum Langavatn en einnig um fjörunar.

- ♥ *Sjósund* eru að verða mjög algeng íþróttagrein og stunduð t.d. í Reykjavík. Hér mætti bjóða upp á sjósundsferðir frá höfninni eða öðrum heppilegum stað. Bjóða þyrfti upp á kennslu í sjósundi og einnig allan búnað sem þarf. Á námskeiði yrði farið yfir helstu öryggisatriði sjósunds.
- ♥ *Jet Ski* á Berufjarðarvatni er ein hugmynd sem mætti skoða. Ferðapjónustuaðilar yrðu þá að koma upp aðstöðu fyrir áhugasama um Jet Ski, leigja út allan búnað og vera með kennslu.
- ♥ Gönguferð um Barmahlíð er vinsæl á sumrin. Þá er skartar náttúran sínu fegursta og þá er upplagt að fara með nesti og nýja skó og ganga Barmahlíðina þvera og endilanga.

### Lokaorð

Þessar hugmyndir eiga að efla menningu á staðnum. Virkja þarf fólkið sem býr í Reykhólasveit og fá alla með í því að auka fjölbreytnina á svæðinu. Öll viljum við auka atvinnu, menningu og alls konar starfsemi. Svo má ekki gleyma öllu því sem nú þegar er gert á svæðinu, s.s. handverksmarkaðir, Reykhóladagar o.s.frv. Ferðamenn munu flykkjast á staðinn þegar þetta allt verður orðið að veruleika.

Ég ætla að ljúka þessu með fyrstu tveimur erindum ljóðs sem Jón Thoroddsen orti um Barmahlíðina.

### Barmahlíð

Hlíðin mín fríða  
hjalla meður græna,  
blágresið blíða,  
berjalautu væna,  
á þér ástaraugu  
ungur réð ég festa,  
blómmóðir besta.

Sá ég sól roða  
síð um þína hjalla  
og birtu boða  
brúnum snemma fjalla.  
Skuggi skaust úr lautu,  
skreið und gráa steina,  
leitandi leyna.